

萬有文庫

第二集七百種

王雲五主編

洪北江詩文集

(八)

洪亮吉撰

商務印書館發行

洪北江詩文集

(八)

洪亮吉撰

萬有文庫

第二集七百種

總編纂者

王雲五

商務印書館發行

附鮚軒詩目錄

卷一

機聲鐙影集

古今體詩一百一首

卷二

采石敬亭集

古今體詩八十七首

卷三

黃山白嶽集

古今體詩五十三首

卷四

長淮清潁集

古今體詩四十一首

卷五

桐廬林屋集

古今體詩五十九首

卷六

鍾阜蜀岡集

古今體詩八十五首

卷七

茅峯攝山集

古今體詩八十二首

卷八

天台雁蕩集

古今體詩六十一首

附鮎軒詩卷第一

機聲鐙影集 十三至二十歲作。

元夕侍母坐命作

阿姊邀題句。慈親偶破顏。十年風雪裏。始覺有春還。

附塾篇

送爾書堂去。窗疎尙見星。母勤三歲績。兒受一年經。影小扶簾入。聲長隔院聽。敝衣經數補。莫訝未純青。

驅兒篇

補癸酉歲作。

余八歲。自塾中遣歸。吾母抱余泣。云云。及稍長有知。遂作驅兒篇。以記母語。

東家驅兒。不使讀書。兒跪告母。母驚兒呼。西家驅兒。不使入塾。兒跪告師。兒已受扑。入告母。出告師。孤兒不食淚若絲。牧羣羊。牧羣豕。孤兒寧願讀書死。君不見三尺孤兒亦人子。

歲歉篇

十三知歲歉。十四忍朝饑。母病逋師俸。兒長著父衣。瘦憐親串識。貧覺館僮譏。冷巷歸來晚。書聲出破扉。

精衛

精衛精衛。生於海東。朝銜西山石。莫投東海中。力不自度。凡禽笑之。精衛精衛。勞无已時。心雖勞。志不改。塵飛揚。在東海。

正月十三夜至前橋訪姊二鼓始棹舟還

月午都將歸路迷。蜻蜓舟小住前谿。夢回三處尋蹤跡。影落水南魂水西。

夜起

不寐三更後。孤行衆竹中。夜光非借月。暗響不因風。影逐棲樓燕。肩差倚井桐。縑囊私晷句。未敢付奚童。

詠史篇

運去矣。籍若何。八千人散漢一歌。時至矣。勝亦武。百二關亡楚三戶。噫吁嘻。秦明月。漢大風。恨有豎子無英雄。

母命詠月

乍覺冰蟾透下力。旋聞花漏入三商。此時金粟欲無影。徹夜玉繩微有光。眼底樓臺空浩渺。秋中節物自清涼。翩翩歸妹西行好。莫更拈著怨有黃。

遣僕篇 先君遣一僕以歲歉遣去。作此送之。

影小如余瘦。形疲覺汝饑。青蒿憐故食。黃葉補秋衣。炊冷泉通竈。眠遲露入扉。舊巢猶苦戀。清淚滴依依。

同蔣十二阿定登太平寺浮屠

君從城北來。覓我城東路。松花一枝折。尙新知。是卜家墳上樹。東門橋邊七層塔。君上一層心轉怯。屏顏紅坐綠蒲團。怪我偏將塔鈴踏。

閨思同蔣十二賦暑花字

簾明知夜起。閣敞看朝霞。影瘦只疑鳥。顏春欲誤花。情尤耽諷詠。意解惜年華。墨瀋留噍類。牋紋印指叉。庭隅垂竹實。牆隙隱匏瓜。穿樹鶯何急。巢梁燕乍譁。卻嫌漏消息。不放入窗紗。

郭北篇

辛巳歲。洪子讀書郭北鄒翁家。翁憐其貧。欲以女妻之。聞有所聘。乃止。洪子感其意。作郭北篇。

兒家城東偏。翁家郭北隅。附翁錢一千。伴翁兒讀書。讀書書何多。翁言兒大好。枉有七八男。無如此兒嬌。翁言欲壻兒。設此堂上尊。十三名家息。十五廉吏孫。兒言苦濡澁。座客顧告翁。強自致一詞。柰此兩頰紅。兒宗實蕭蕭。母淚復縷縷。前織一匹縑。已聘貧室女。門前田十雙。屋內錦十箱。翁言雖至誠。厚意固不當。清明後一日得蔣十二阿定江西計。

惜別河干尙縱談。蜻蜓舟小水拖藍。春光乍到一百五。慧質肯過十二三。髮綠挂窗留鳥愛。顏紅入鏡識花慙。明晨哭爾西郊去。酒滿銅瓶筍滿籃。

南樓夜宿

後牖穿明月。前樓看曙星。水分三面綠。天入一隅青。影暗藏書幌。魂驚貼畫屏。眠遲偏易醒。警夢有檐鈴。母命口占送從母歸芳茂山故宅

巢成好挈孤雛去。羹盡難依邱嫂居。裁帛寄親千里外。時外王母就養江四官舍未歸簪蒿隨姊十年餘。谿田此日通漁舫。鄉夢全家上鹿車。只有諸甥偏戀母。櫻桃花下遞牽裾。

初三

初三花發檻。初五月窺門。樓小難藏影。簾重不隔魂。蛛絲黏鏡溼。鼠淚滴鐙昏。笛憶參差響。書摩宛轉痕。病中作

病怕春光到眼前。未尋鐙火已孤眠。裹中自有空明月。身外都成浩渺天。偶憶紅顏思覽鏡。慵梳綠髮任垂肩。顏生衰早終生天。誰向黃塵羨永年。

樓居

只覺樓居好。簾鉤靜裏斜。頽牆只三尺。春影過人家。

破曉

破曉簾前望。園荒綠欲齊。春知來路闊。天覺過牆低。驚筍有時折。野鶯無數啼。萋萋一坡草。踏爾過橋西。

中井鄉歌爲鄒翁賦

山花只入房。山燕只棲梁。一春綠竹不過牆。一生遊魚不出塘。誰來丈人家。北郭瘦李西谿楊。誰和丈人詩。南巷狂沈東頭王。丈人十雙田。歲得千斛糧。丈人一陂澤。歲牧千尾羊。嫁女不插花。娶婦但識桑。人間有此太古方。丈人不出中井鄉。

擬古豔詞

夜扇開幽影。春燈卸別輝。林花送愁去。棲燕抱魂歸。坐久風添陣。更闌月有圍。剩寒回繡幕。選夢入孤幃。寄大興朱編修筠

壬午冬。在友人處讀公古賦數首。愛不忍釋。又聞公愛士。遂作此寄之。

昭陽歲涂月。公文傳手鈔。聞公學昌黎。興極乃欲號。昌黎善爲文。乃不識李翱。昌黎善爲詩。乃不值孟郊。我生十年學刺嘈。慈母訓我窮風謠。哦詩切雅賦切騷。世哂才士如秋毫。君不見公文足戴北斗杓。我筆亦傾東海濤。

省蔣十二墳

爲種一枝柏。流青入夜臺。攀條盡西向。記爾未生回。

芳茂山省從母

小築谿深處。都憐補薜蘿。亂山開戶遠。秋月閉門多。衣冷親添繭。燈昏乍拂蛾。遲眠貪久語。不覺夜全過。
二月十三日夜。乘月出城。至小東門橋。迷路三鼓始反。

橋南未有人。橋北盡春墳。轉向危橋立。聽鐘別夜分。橋心暉暉月華滿。魚影過。驚人影短。三更倦立倚孤桃。燕子識人來處遠。

藥裏

藥裏猶餘病裏身。三層閣小住幽辰。風簾白墮棲魂燕。花徑紅遮入夢人。往事雨昏勞把燭。此間天遠定無塵。蕭郎指爪愁都落。莫向閒中說好春。

午睡

一樹藤花六尺牀。錫簫聲遠繞空牆。幽眠乍起渾無事。新月在天春晝長。

題阿房宮圖

一百萬卒長城中。四十萬卒新安東。咸陽閭左已盡發。餘者內築阿房宮。小刑鞭笞大刑族。趣就咸陽萬間屋。連城跨渭百里餘。日月光窮許然燭。秦家築城非一隅。秦家築宮連百區。雄心一世至萬世。束縛黔首常安居。可憐絹粉今淒瑟。焦土星星野螢出。版屋祠荒賽百蟲。阿房賦冷吟殘蠹。噫吁嘻。愍儒鄉火一日。咸陽宮火三月。君不見。楚人灰紅秦燼黑。漢家龍興由火德。

芳茂山夜宿

節物無端五月前。喧聲徹夜擾幽眠。雷穿石壁都成窟。雨挾谿魚欲上天。深洞三時寒地氣。斷山十里接人烟。清閒不復營餘事。靜把元經曉夕研。

樓高

樓高笑語輕。飄樹復驚鶯。衫袖春風轉。房櫳曙色明。禽迷窺鏡影。竹隱上梯聲。幾日園梅發。疎窗綠綺橫。過潘二振煥故居書示其猶子尙基

傷春曾記款朱門。一樹桃花一酒尊。苦憶君家狂阮籍。幾回花落與招魂。

園居

十里巢禽樹。春深客到初。上樓人影瘦。威燭雨聲疎。隔歲書猶讀。齊年髮共梳。庾郎貧正甚。同此食園蔬。杏花樓春望

把書時復上層梯。愛看春濃柳覆隄。不惜工夫待殘月。藤床移向曲闌西。

初生十五六

初生十五六。如犢甫離乳。車旁隨母走。相距不數武。誠知芻秣好。未識誰是主。忽報上齒生。勞勞駕車苦。初生十五六。如鳥始出巢。毛翮雖未強。氣已凌碧霄。一母將衆雛。飛處不欲高。朝出莫共還。稍知念劬勞。

初生十五六。如水初離源。到海尙有時。流聲已喧喧。洪纖悉包羅。意欲長百川。冰夷倘相嗤。何況鮪與鱸。
初生十五六。如月始離海。彎彎雖無多。九野識光采。延回到中天。河漢色已改。太白出較遲。何能久相待。

小池春漲

昨宵驚波來。漂去所著屐。下牀方欲索。摸得一雙鯽。

雲谿春詞

欹枕蓬窗聽雨眠。記來前事當遊仙。銷魂一曲雲谿水。坐閱春光十九年。
憶別城西爾許時。強邀相見出偏遲。生疎樓閣生疎意。却耐渠儂百日思。
樓上紅燈影接天。更闌催擺賞花筵。半酣只說沉沉醉。吹笛聲中自在眠。
疎窗三面綻薔薇。乍暖欣看試袂衣。忽地絃聲落天半。趙家樓上紙鳶飛。
銀燈影裏說元宵。踏月欣從女伴招。攜得合歡何處放。半坡春水葛仙橋。
短短疎楊綠未成。溪流闊處有波聲。臨河亭北開圓牖。買得銀鱗便放生。
相逢剛及上頭時。百種聰明不自知。憶向瑣窗談故事。比來都已入新詩。
方書繙徧日偏長。四月陰濃葉亦香。正是日來垂手處。滿欄梅子一齊黃。
尋常鏡匣傍簾鉤。筆硯拋來懶不收。却恐被人窺楷法。故揉牋紙擲床頭。

新開池館曲廊邊。拜月人來月抱肩。一度逢人作莊語。偷開笑靨百花前。
錄罷仙人肘後方。小疲時復倚回廊。學來百種玲瓏語。反覺鸚哥舌本強。
約伴同遊出獨遲。半宵偷謁社公祠。王孫古巷行將到。記得嘉名在楚詞。
城東烟景劇參差。玉局堂前花百枝。行到硯池剛欲歇。暗中扶柳立多時。
一度登樓望若仙。忽驚帆影逼吟肩。生來不識天涯路。卻問春江在那邊。
石徑玲瓏漬古苔。堂扉斜對小池開。花磚南北皆知數。立盡三更夜月來。
山莊春半踏青無。處處危橋藉柳扶。獨向回廊看新月。任他女伴隔河呼。
平頭艇子擣雙枝。畫板平鋪上岸遲。却訝海棠陰覆屋。六年不到晏公祠。
幾日西頭戶嬾開。却從仄徑上層臺。無端一片落花過。兜起昨宵春夢來。
把書時復到吟堂。病久應愁學殖荒。一事乍教開笑口。親聞家舅譽韓康。
比來多分識春愁。不遣雙鬟上小樓。只有畫廊雙燕子。飛來飛去看梳頭。
愛向閑亭自煮茶。壞牆北去路交叉。鄰姬怪底時來往。籬角先開姊妹花。
水明樓上晚涼多。摘得新橙手自搓。閒倚石闌談往事。忽驚天眼裂如梭。
閒愁誰復理衫裳。書籍拋殘滿曲廊。只有畫箱親自鎖。不知何事費提防。

八字分明記肯差。盈盈十五說年華。無端欲索生辰禮。一盒秋窗染指花。
兩株仙桂倚閒廳。幾日迷藏捉未停。同是曲欄何處躲。欲將纖影貼門屏。
朝來小婢却頻催。曉日三竿戶乍開。一把鬢絲梳未得。傳呼阿母過房來。
苦雨連宵夢不成。臨街樓上盼朝晴。春泥一巷深三尺。偏認東來蠟屐聲。
居然板屋仿浮槎。六六文窗刷絳紗。何事五更簾已捲。欲乘殘月看疎花。
尋常不肯款書樓。却爲花香少滯留。猶憶兩重門內事。一聲靈鵲惹回頭。
小閣新懸蛺蝶圖。年除不更貼桃符。宜春帖子催書過。好代堂前拜紫姑。
商量誰可伴青春。二月花枝二十人。攜得鏡臺何處去。杏花樓上度生辰。
園扉東去闢書堂。不遣簾櫳透日光。奇福却教消受盡。百花香裏貯匡牀。
病來仍不廢吟哦。紙做閒教小婢摹。欲向人前詡師法。強將難字課鸚哥。
一句纔歇雨廉纖。臨水家家喚卷簾。剛是日西勻面了。龍舟已到白雲尖。
詩社年來不暫停。秋蟬吟後詠春星。憑他百首堆吟案。只許蕭郎有性靈。
識字先憂命不辰。頻推甲子恨梟神。羨他阿姊生來福。已遣羊車嫁璧人。
別來相見較矜莊。一卷華嚴禮法王。添種碧桃三兩樹。攔他春夢入閒房。

欄街報喜有紅箋。返棹匆匆泊岸邊。却被校官傳釋菜。替簪花朵出筵前。
清修只有燕鶯知。背客從無一語私。我本學仙卿學佛。十年端愧說相思。
一春心事訴花枝。猶恐花枝笑客癡。誰向樽前按檀板。聲聲譜出惱春詞。

獨酌謠

獨酌謠。獨酌無所好。生來菖蒲花。不解向人笑。阿三爲我提壺。阿二爲我行沽。風吹門開。胡蝶自來。揮之
不去。落我酒杯。一杯邀春風。一杯待明月。嘖嘖嘈嘈聲不歇。市上人催酒錢切。
獨酌謠。獨酌無所知。離離春心開。飄飄若遊絲。山風爲我披襟。百舌爲我行吟。樓高三層。月不得升。磷火
飛出。光明若鏡。上樓鐘聲三。下樓鼓聲四。冥冥濛濛飛雨至。蝙蝠嚇人還展翅。
獨酌謠。獨酌無所憂。天邊開八門。地上列九州。三江昨餉鯨鮓。百粵復饋離支。何曾開筵。日食萬錢。邊令
之腹。無其便便。一石亦不多。一斗亦可已。琳琳瑯瑯樂聲起。勸客高眠洞房裏。
獨酌謠。獨酌無所待。劉伶及杜康。倏忽渺千載。北斗爲我持杓。列宿爲我鋪糟。花開如盤。勸客盡歡。出飲
市上。萬人圍觀。牛醫既可招。狗屠亦難捨。朝朝夜夜心自寫。狂藥醉人無死者。

亦園卽事

名園都枕郭西頭。乘興聊爲三日留。銀燭樹寒人病酒。紫薇花發月當樓。閒禽自欲當軒下。秋水居然奪

戶流。小坐石闌聽一曲。謝郎含笑李郎愁。

雙船行。大姊命賦。送楊氏表姊歸芳茂山。

儂家住橫山。生長山橋東。昨日出養神。忘却拜社公。來時船頭雨。去時船頭風。儂家住雲溪。生小繡古佛。歸寧無一程。返棹不終日。來時半帆風。去時半帆月。雙船遙遙何處分。出得小溪當水門。姊行持香妹持燭。同向晏公祠內祝。

將至崑山訪從叔縣尉

百里初看束急裝。白家橋左趁船忙。春山一路題詩好。阿姊先爲製錦囊。

崑山登文筆峯

山風昨夜穿窗破。落月一峯床上墮。起來失喜闌北扉。雲氣縷縷穿人衣。林梢四面天光出。破曙看山始親切。牀頭拉客客不應。乘興攜屐還孤登。褰衣只向山岡上。峯勢離人忽千丈。前行百折出樹梢。平視正對中峯腰。誰言峯勢高疑絕。一塔從空復飛出。峯臻一層塔七層。僧老爲剔長明燈。坐來足底雲生滅。萬瓦鱗鱗恍居穴。樓頭酒人知尙眠。詎識客已臻山巔。君不見。十年平地居局促。此日登山願粗足。西南一抹欲望家。卻值海上生紅霞。

虎邱